



Rialtas na hÉireann
Government of Ireland

Mar a Thoghtar an Seanad (Teach Uachtarach na Parlaiminte)

1.	Réamhrá.....	3
2.	Struchtúr an tSeanaid.....	3
3.	Cé a fhéadfaidh a bheith ina Sheanadóir?	3
4.	Tráth toghcháin.....	3
5.	An modh toghcháin.....	3
6.	Rolla-Chomhaltaí.....	4
7.	An clár Chomhlachtaí Ainmniúcháin.....	4
8.	Ainmniúchán iarrthóirí.....	4
9.	An líon comhaltaí tofa.....	5
10.	Cé a fhéadfaidh vótáil?.....	5
11.	An vótaíocht.....	6
12.	An comhaireamh	6
13.	Corr-Thoghcháin.....	7
14.	Comhaltaí Ollscoile.....	7
15.	Síntiúis a nochtadh	9
16.	Dlí toghcháin an tseanaid	10
17.	Bileoga eile	10

Mar a thoghtar an Seanad

(Teach Uachtarach na Parlaiminte)

1. Réamhrá

Tá an nóta seo beartaithe mar threoir phraiticiúil. Ní léirmhíniú dlíthiúil é ar dhlí toghcháin an tSeanaid. Do thuilleadh eolais ba chóir duit féachaint ar an dlí a bhaineann le toghcháin an tSeanaid (féach 16 thíos).

2. Struchtúr an tSeanaid

Tá an Seanad comhdhéanta de 60 comhalta. Ainmníonn an Taoiseach (Príomh-Aire) aon chomhalta déag, toghann céimithe ollscoile 6 chomhalta agus toghtar 43 ó rollaí iarrthóirí atá ionadaíoch ar leasanna gairme sonraithe.

3. Cé a fhéadfaidh a bheith ina Seanadóir?

Tá gach saoránach d'Éirinn os cionn 21 bliana d'aois agus nach bhfuil dícháilithe ag an mBunreacht nó le dlí incháilithe lena thoghadh nó lena toghadh chuig an Seanad. Tagraítear do chomhalta den Seanad mar Seanadóir nó *Senator*. Tá daoine a bhfuil pianbhreith príosúnachta níos mó ná sé mhí á gcur isteach acu agus daoine mímheabhreacha dícháilithe do thoghadh. Tá slite beatha áirithe atá neamh-chomhoiriúnach le comhaltas den Seanad, mar shampla, comhaltaí den bhreithiúnacht, oifigigh shinsearacha institiúidí an Aontais Eorpaigh, státseirbhísigh, comhaltaí lánaimsire de na Fórsaí Cosanta agus Gardaí (póilíní).

4. Tráth toghcháin

Caithfidh olltoghchán chuig an Seanad a bheith ann ag tráth nach déanaí ná 90 lá tar éis an Dáil (An Teach Íochtarach) a lánscor. Bíonn dátaí na gcéimeanna éagsúla den toghchán (ainmniúchán, vótaíocht, etc) ceaptha le hordú ag an tAire Tithíochta, Rialtais Áitiúil agus Oidhreachta.

5. An modh toghcháin

Tionólfar na toghcháin de réir na hionadaíochta cionmhaire agus ar mhodh an aonghutha inaistrithe agus le rúnbhallóid poist.

6. Rolla-Chomhaltaí

Toghadh na 43 Rolla-Chomhalta

Roimh gach Olltoghchán cruthaítear cúig rolla d'iarrthóirí a bhfuil eolas agus taithí phraiticiúil acu sna leasanna agus seirbhísí seo a leanas faoi seach:-

- (i) An Rolla Saíochta agus Oideachais: - an teanga agus an tsáocht náisiúnta, litríocht, ealaín, oideachas, dlí agus liacht;
- (ii) An Rolla Talmhaíochta: - talmhaíocht agus gnóthaí a bhaineann léi agus iascaireacht;
- (iii) An Rolla Oibreachais: - oibreachas, cibé comheagraithe nó nach ea;
- (iv) An Rolla Tionscail agus Tráchtála: - tionscal agus tráchtáil, ar a n-áirítear baincéireacht, airgeadas, cuntasáíocht, innealtóireacht agus ailtireacht;
- (v) An Rolla Riaracháin: - riarachán poiblí agus seirbhísí comhdhaonnacha, lena n-áirítear obair chomhdhaonnach dheonach.

7. An clár Chomhlachtaí Ainmniúcháin

Coinníonn ceann comhairimh an tSeanaid (Cléireach an tSeanaid) clár de chomhlachtaí atá i dteideal iarrthóirí a ainmniú ar na rollaí iarrthóirí. Le bheith incháilithe do chlárú mar chomhlacht ainmniúcháin, caithfidh baint a bheith ag an eagraíocht go príomha le gnóthaí agus seirbhísí cheann nó eile de na rollaí, agus a bheith ionadaíoch orthu. Ní fhéadfaidh comhlacht a bheith cláraithe i ndáil le níos mó ná painéal amháin.

Níl eagraíochtaí atá ina ngnóthais déanta brabúis go príomha incháilithe do chlárú. Déantar an clár a athbhreithniú go bliantúil.

8. Ainmniúchán iarrthóirí

Tá dhá fho-rolla ann do gach rolla: an fo-rolla do Chomhlachtaí Ainmniúcháin agus an fo-rolla don Oireachtas. Féadfaidh gach comhlacht ainmniúcháin cláraithe i ndáil le rolla líon socraithe iarrthóirí a ainmniú don rolla sin.

Comhdhéanann na hiarrthóirí sin fo-rolla na rollaí difriúla do chomhlachtaí ainmniúcháin. Féadfaidh aon cheithre chomhalta de Dháil nua-thofa nó de Sheanad atá i ndeireadh a thréimhse iarrthóir amháin a ainmniú d'aon rolla ach ní fhéadfaidh gach comhalta a bheith páirteach ach in aon ainmniúchán amháin. Is iad na hiarrthóirí sin an fo-rolla don Oireachtas (Parlaimint). Caithfear íoslíon sonraithe de chomhaltaí a thoghadh do gach fo-rolla.

9. An líon comhaltaí tofa

Seo a leanas an líon comhaltaí atá le toghadh ó gach rolla agus an t-íoslíon a chaithfear a thoghadh as gach fo-rolla:

Painéal	An Líon Comhaltaí	An t-íoslíon atá le toghadh ó gach fo-rolla
Saíocht agus Oideachas	5	2
Talmhaíocht	11	4
Oibreachas	11	4
Tionscal agus Tráchtáil	9	3
Riarachán	7	3
Iomlán	43	

10. Cé a fhéadfaidh vótáil?

Féadfaidh na doine seo a leanas vótáil ag olltoghchán de rolla-chomhaltaí:

- Comhaltaí den Dáil atá ag teacht isteach,
- Comhaltaí den Seanad atá ag dul amach,
- Comhaltaí de comhairlí cathrach, comhairlí contae agus comhairlí cathrach agus contae.

Ní bhíonn ach aon vóta amháin ag gach toghthóir i ndáil le gach rolla fiú má bhíonn sé nó sí cáilithe i níos mó ná gné amháin. Is thart ar 1,000 atá sa líon toghthóirí.

11. An vótaíocht

Eisíonn an ceann comhairimh liosta de na hiarrthóirí atá ainmnithe do gach rolla, a léiríonn na comhlachtaí nó daoine a rinne na hainmniúcháin, do gach vótálaí. Ar an lá a bheidh eaptha le hordú ag an tAire Tithíochta, Rialtais Áitiúil agus Oidhreachta, seolfaidh an ceann comhairimh, leis an bpost cláraithe, cúig páipéar ballóide (ceann do gach painéal) ag taispeáint ainmneacha na n-iarrthóirí in ord aibítire, a seoltaí agus a dtuairiscí, grianghraif, más ann agus an fo-rolla dá bhfuil siad ainmnithe, chuig gach vótálaí. Ní bhíonn cleamhnacht pholaitíochta, más ann, na n-iarrthóirí taispeánta ar na páipéir bhallóide. Marcálann an vótálaí, tar éis dearbhú céannachta a chomhlánú i láthair duine údairithe, ord a rogha iarrthóirí ar gach páipéar agus cuireann na páipéir bhallóide ar ais leis an bpost cláraithe chuig an gceann comhairimh.

12. An comhaireamh

Bíonn comhaireamh ar leithligh ann do gach rolla. Déantar na páipéir bhallóide a shórtáil de réir na chéad rogha a bhíonn taispeánta orthu. Chun comhaireamh a éascú tugtar luach de 1,000 do gach vóta. Déantar luach cuí a vótaí chéad rogha a chreidiúnú do gach iarrthóir. Is é an cuóta an líon íosta vótaí a bheidh riachtanach chun toghadh iarrthóra a ráthú. Fionntar é trí luach iomlán na vótaí bailí a roinnt ar uimhir a mbeidh a haon de bhreis aici ar an líon suíochán atá le líonadh agus a haon a chur leis an toradh. Más rud é, mar shampla, gur 900,000 líon iomlán na vótaí a chaitear i ndáil le painéal agus go mbíonn 5 shuíochán le líonadh, is 150,001 a bheidh sa chuóta, eadhon

$$\frac{0.9m}{6} + 1.$$

Feicfear, sa sampla seo, gur cúig iarrthóir amháin (an líon atá le toghadh) a d'fhéadfadh an cuóta a bhaint amach.

Má bhíonn luach vótaí iarrthóra comhionann leis an gcuóta, nó níos mó ná an cuóta, meastar tofa é nó í mura ndán is go ndéanfadh a dtoghadh dodhéanta é an t-íoslíon comhaltaí ó gach fo-rolla a thoghadh (féach 9 thuas). Má fhaigheann iarrthóir níos mó ná cuóta, déantar an barrachas a dháileadh ar na hiarrthóirí a bheidh fágtha de réir na chéad rogha éifeachtaí eile a bhíonn

taispeánta ar na páipéir bhallóide. I gcás go mbíonn an líon uasta iarrthóirí tofa d'fho-rolla, déanfar luachanna vótaí na n-iarrthóirí a bhíonn fágtha ar an bhfo-rolla sin a dháileadh de réir na chéad rogha éifeachtaí eile a bhíonn taispeánta ar na páipéir a bhíonn i gceist. Mura mbíonn barrachas ag aon iarrthóir, déanfar an t-iarrthóir is ísle a eisiámh agus déanfar a vótaí a dháileadh ag an luach a bhfuair sé nó sí iad. Ní féidir iarrthóir a eisiámh, áfach, más rud é go ndéanfadh a eisiámh dodhéanta é an t-íoslíon comhaltaí ó gach fo-rolla a thoghadh.

13. Corr-Thoghcháin

I gcás go dtarlaíonn corr-fholúntas sa Seanad trí éag, teacht faoi dhícháilíocht nó éirí as oifig do rolla-chomhalta, líontar an folúntas le corrtoghcháin.

Féadfaidh naonúr comhaltaí den Oireachtas iarrthóir a ainmniú i ndáil le folúntas fo-rolla don Oireachtas; féadfaidh comhlacht ainmniúcháin don rolla iomchuí iarrthóir a ainmniú d'fholúntas i bhfo-rolla do chomhlachtaí ainmniúcháin. Bíonn na toghthóirí ag corrtoghcháin comhdhéanta de chomhaltaí na Dála agus an tSeanad, 220 ar an iomlán. Déantar an vótáil trí rúnbhallóid phoist. Bíonn an nós imeachta comhairimh mar a chéile leis an nós imeachta ag Olltoghcháin don Seanad ach d'uireasa an mhodhnaithe is gá lena chinntiú go mbíonn an t-íoslíon tofa ó gach fo-rolla.

14. Comhaltaí Ollscoile

Toghadh na 6 Chomhalta Ollscoile

Toghlaigh

Is iad na toghlaigh do chomhaltaí ollscoile a thoghadh chun an tSeanad ná Ollscoil na hÉireann agus Ollscoil Bhaile Átha Cliath (Coláiste na Tríonóide). Toghann siad araon 3 chomhalta. Níl ionadaíocht ag ollscoileanna eile agus ag forais ardoideachais eile sa Seanad faoi láthair.

Cé a fhéadfaidh vótáil?

Tá gach saoránach d'Éirinn atá 18 mbliana d'aois ar a laghad agus a fuair céim, seachas céim oinigh, ón ollscoil lena mbaineann i dteideal a bheith cláraithe mar thoghthóir. Is thart ar 110,000 líon toghthóirí Ollscoil na hÉireann agus is thart ar 50,000 líon toghthóirí Ollscoil Bhaile Átha Cliath. Is í

an ollscoil lena mbaineann a chothabháil an liosta toghthóirí agus a thugann cothrom le dáta é.

Ainmniúchán iarrthóirí

Caithfidh iarrthóirí a bheith ainmnithe ag dhá thoghthóir cláraithe don ollscoil. Caithfidh ocht dtoghthóir cláraithe eile don ollscoil aontú leis an ainmniúchán. Níl aon cheanglas go mbeadh an t-iarrthóir ina chéimí nó ina céimí den ollscoil lena mbaineann ná go mbeadh baint aige nó aici léi ar aon bhealach.

Postas in aisce d'iarrthóirí

Tá gach iarrthóir i dtoghchán ollscoile don Seanad i dteideal litir thoghcháin amháin a sheoladh, saor ó mhuirear poist, chuig gach toghthóir sa toghlach. Is é an Stáitchiste a chlúdóidh costas na saoráide sin.

Olltoghchán

Laistigh de 7 lá ó lánscore na Dála bíonn ar an tAire Tithíochta, Rialtais Áitiúil agus Oidhreacht na dátaí iomchuí a cheapadh chun olltoghchán chomhaltaí ollscoile chun an tSeanad a stiúradh. Is ceann comhairimh ar oifigeach den ollscoil lena mbaineann é nó í a dhéanfaidh an toghchán a stiúradh. Is leis an bpost a dhéanfar an vótáil agus tionólfar an toghchán de réir phrionsabail na hionadaíochta cionmhaire, agus aonghuth inaistrithe a bheith ag gach toghthóir. Nuair a bheidh páipéir bhallóide á n-eisiúint, eiseoidh an ceann comhairimh foirm dhearbhu céannachta freisin a chaithfidh an toghthóir a chomhlánú i láthair finné agus a chur ar ais leis an bpáipéar ballóide. Déanfar an comhaireamh a stiúradh ar an tslí chéanna le comhaireamh ag toghchán comhaltaí chuig an Dáil.

Corr-thoghchán

I gcás go dtarlaíonn corr-fholúntas trí éag, teacht faoi dhícháilíocht nó éirí as oifig do chomhalta ollscoile, líonfar an folúntas le corrtoghchán. Bíonn an nós imeachta ag corrtoghchán mar a chéile le holltoghchán comhaltaí ollscoile.

15. Síntiúis a nochtadh

Tá glacadh le síntiúis chun críocha polaitíochta rialaithe le dlí. Ní fhéadfaidh ionadaithe poiblí agus iarrthóirí ar thoghadh síntiús is mó ná €1,000 a ghlacadh ó dhuine i mbliain ar leith. I gcás páirtí polaitíochta nó grúpa feachtais, ní fhéadfaidh an síntiús uasta a ghlactar a bheith níos mó ná €2,500. Tá cosc ar shíntiúis a ghlacadh ó dhuine nach saoránach d'Éirinn é nó í agus a bhfuil cónaí air nó uirthi thar lear.

Ní mór 'síntiúsóir corparáideach' ar mian leis síntiús níos mó ná €200 a thabhairt d'iarrthóir, d'ionadaí tofa, do pháirtí polaitíochta nó do ghrúpa feachtais tríú páirtí a bheith cláraithe leis an gCoimisiún um Chaighdeán in Oifigí Poiblí. Maidir le síntiús atá níos mó ná an méid sin agus a fhaightear ó shíntiúsóir corparáideach, ní mór ráiteas a bheith in éineacht leis á rá gur cheadaigh comhaltaí, scairshealbhóirí nó iontaobhaithe an chomhlachta is síntiúsóir an síntiús. Is é atá sa tsuim uasta a bhféadfar glacadh léi ó 'síntiúsóir corparáideach' nach bhfuil cláraithe ná €200. Is é atá sa mhíniú ar shíntiúsóir corparáideach ná (i) comhlacht corpraithe; (ii) comhlacht neamhchorpraithe daoine, nó (iii) iontaobhas.

Is é atá sa tsuim uasta a bhféadfar glacadh léi mar shíntiús airgid thirim sa bhliain chéanna ná €200.

Bíonn ar iarrthóir ag toghchán Seanaid nach n-éiríonn leis nó léi, ráiteas a thabhairt don Choimisiún um Chaighdeán in Oifigí Poiblí, laistigh de 56 lá ó chríochnú na vótaíochta ag an toghchán, ag léiriú an bhfuair siad aon shíntiúis ba mhó ná €600 don toghchán agus sonraí a thabhairt d'aon shíntiúis den sórt sin agus de na daoine a rinne iad. Bíonn ar gach comhalta den Seanad ráiteas síntiúis comhchosúil a thabhairt don Choimisiún um Chaighdeán in Oifigí Poiblí, faoin 31^ú Eanáir gach bliain, i ndáil leis an mbliain fhéilire roimhe sin.

Chomh maith leis sin, bíonn ar gach páirtí polaitíochta ráiteas a thabhairt don Choimisiún um Chaighdeán in Oifigí Poiblí, faoin 31^ú Márta gach bliain, ag léiriú an bhfuair siad aon shíntiúis ba mhó ná €2,500 agus ag tabhairt sonraí aon síntiús den sórt sin agus sonraí na ndaoine a rinne iad.

16. Dlí toghcháin an tseanaid

Is é an dlí a bhaineann le toghadh comhaltaí don Seanad le fáil go príomha sna forálacha dlí seo a leanas, arna leasú:

- in Airteagail 18 agus 19 de Bhunreacht na hÉireann,
- in Acht Toghcháin an tSeanaid (Rolla-Chomhaltaí), 1947,
- in Acht Toghcháin an tSeanaid (Comhaltaí Ollscoile), 1937,
- in Acht Toghcháin, 1997

Is féidir na foilseacháin sin a fháil ón Foilseacháin Rialtais, 52 Faiche Stiabhna, Baile Átha Cliath 2 nó féachaint orthu ar líne ag www.irishstatutebook.ie

17. Bileoga eile

Seo a leanas bileoga eile sa tsraith seo atá ar fáil ar láithreán gréasáin na Roinne www.gov.ie/housing:

- Mar a Thoghtar an tUachtarán
- An Reifreann in Éirinn
- Mar a Thoghtar an Dáil (Teach na dTeachtaí)
- Parlaimint na hEorpa: Mar a Thoghtar Ionadaithe na hÉireann
- Mar a Thoghtar Comhaltaí na nÚdarás Áitiúil
- Clár na dToghthóirí
- Eolas do Vótálaithe faoi Mhíchumas

AN ROINN TITHÍOCHTA, RIALTAIS ÁITIÚIL AGUS OIDHREACHTA

Márta 2021

gov.ie/tithiocht

